

## შენ და შემოდგომა

არის ნეტარება - ხშირად მოაგონდეს  
პოეტს შედარება: შენ და შემოდგომა.  
შუქი არ ინთება ჩამქრალ იაგუნდის,  
ოხვრა, გარინდება, შენ და შემოდგომა.

ღამე ბნელზე ბნელი მისდევს უდროობის.  
როგორც ბელზებელი, ქარებს უსადარესს,  
ცრემლი უნდობარი გახრჩობს მარტოობის,  
მაგრამ მეგობარი, ვაი, არსად არის.

მხოლოდ გაგონება ჰანგის უნაზესის  
დაგრჩა მოგონებად: არ ღირს გამოდგომა.  
გული უდაბნოა, სული - ოაზისი:  
შენ და შემოდგომა, შენ და შემოდგომა.

1976